

LA NESTRE LENGHE

D'in chel dì che il Friûl al è passât sot l'Italie 'e je scomenzade la uere cuintri la lenghe furlane.

Cualchidun, salacôr, la veve nulide ancje prin: tra i patrioz dal '48 e dal '59 a'ndi jere di chêi che no si sporcjavin a fevelâ par furlan. Ma chel al jere afâr lôr: i sfuarz par distudâ la lenghe a' son vignûz dopo.

A' son vignûz di ogni bande: de bande di putrôs furlans che àn tacât a scrivi par furlan te maniere plui ridicule, par fâ viodi che il nestri lengâz al è fat di peraulis talianis cun qualche zoncjadure dapît; de bande dai gramatics che si son butâz tan'che liparis aduês dal Ascoli - il prin glotolic dal mont - parvîe ch'al veve vût cûr di dîsi che nol jere pussibil meti il furlan tal complês dai dialez talians; de bande de stampe nazionaliste che jere cjalde di netâ duc' i cinquantemil dialez talians; de bande dal guviâr ch'al dave istruzions segretis di promovi l'invasion di funzionaris e mestris "talians" tal Friûl, par convertî cheste int che no semeave masse contente des tassis sul masinât e de bocjade quistade pal mont spudant balins.

Cun cheste biele pulitiche 'o sin rivâz fintremai ai tims d'aur de farse litorie. In chê volte si è discjadenade un'altre bissebove plui furiose di prin. I prefez a' mandârin la proibizion a dutis lis stamparîis di publicâ ancje une sole rie di furlan e sepi Diu ce vitis che à fat la Filologiche a mola fûr, tra nûi d'incens al "guidadôr", chel fregul di "Strolic". Chel nobil sfuei che si publicave cul non di "Giornale del Friuli" al stampave lis sôs intemeradis, une plui disemplade di chê âltre, butadis jù di quatri temui che di chestis cjosis no vevin mai mastiât nuje. Dopo, alc al è mudât. Alc, no trop. Dai valôrs cuintri-furlans di chê volte, cualchidun al è lâf fûr dai pîs, cualchidun al à gambiade idèe, e cualchidun al à gambiadis, plui di une volte, par vie dal pagnut, dutis lis ideis, furché chê: si viôt che l'opare di cuintrifurlanitât 'e à simpri rindût e ancjmò 'e rint pulît in qualche cjanton.

E uê come uê, a noâltris no nus perdònin di jessi restâz furlans; cun tune nestre muse, cun tune nestre anime - chêi che no àn plui nè anime nè muse - e cun tune nestre lenghe, che jè il spieli di cheste anime. No nus perdònin di molâ fûr cualchidune di chês veretâz che duc' lis viodin e nissun olse dîlis. E alore 'o disìn a duc' i nestris amîs, a duc' i furlans che no àn vendude l'anime par une pironade di lidric: no si à di molâ. Se nus rùgnin cuintri, al ûl dì ch'ò la vin intivade juste. Se nus pòchin de bande de lenghe, al ûl dî che àn capide la sô impuartanze; e al è chest il pont indulà ch'ò vin di tignî plui dûr. Cultivâle, doprâle, studiâle, slargjâle, purgâle dai bastardamenz, cheste lenghe dai nestris viei e de nestre tiare. E je cheste lenghe che nus fâs sintî dentrivie une anime diferente, une dignitât e une personalitât, denant di cualuncue cragne foreste o nostrane.

Patrie dal Friûl, n. 6 16/31 di Marz 1950